

Wujudkan kesepakatan dalam tentukan tarikh PRU
MalaysiaKini.com
March 20, 2012
By Eikhwan Ali

Pilihanraya Umum 13 (PRU 13) merupakan medan pertempuran yang paling sengit dan menurut kajian ia merupakan kemuncak bagi perjuangan menuntut demokrasi.

Barisan Nasional cukup risau sekiranya mereka disingkirkan, mereka tiada upaya untuk bersatu kembali. Dalam masa yang sama, Pakatan Rakyat amat optimis untuk mengambil alih pemerintahan Malaysia.

Kita tinggal sekejap soal kemenangan, kita suburkan keharmonian politik dengan kesepakatan bersama dalam beberapa perkara. Ruang perbincangan dan penentuan sesuatu keputusan perlu digarap bagi melancarkan agenda keharmonian politik.

Salah satu ruang yang ada ialah kesepakatan penentuan tarikh pembubaran parlimen oleh BN dan Pakatan. Seperti yang diamalkan di United Kingdom antara parti Konservatif dan parti Liberal Demokrat.

Dengan adanya kesepakatan ini, dapat mengurangkan ketegangan antara parti politik, dalam masa yang sama dapat memenuhi tuntutan sesebuah parti politik.

Sikap Datuk Seri Najib Razak terus berahsia mengenai tarikh PRU13 akan diadakan, menimbulkan sangsi oleh semua pihak. Ini jelas terbukti, ketika melancarkan Kelab Koresponden Asing Malaysia di Kuala Lumpur, apabila beliau meminta semua pihak memahami kenapa beliau terpaksa merahsiakan tarikh PRU13.

Pihak Gabungan Mahasiswa Islam SeMalaysia (Gamis) risau sekiranya tarikh pilihanraya dimanipulasi bagi memenangkan sesebuah parti politik. Suasana ini juga berlaku kepada pilihanraya kampus (PRK) di sesetengah kampus yang sehingga pada hari ini, masih berteka-teki dengan tarikh PRK.

Pihak Gamis mendesak supaya parti-parti lain diberi ruang dalam menentukan tarikh pembubaran parlimen bagi menjamin keharmonian politik dan juga mengelakkan sebarang bentuk manipulasi .

Copyright © 1999-2012 Mkini Dotcom Sdn. Bhd
Source: <http://www.malysiakini.com/news/192570>

